

List učenika Osnovne škole "Suljo Čilić" Jablanica

MOSTOVI



DECEMBAR/PROSINAC 2021.

Dragi čitaoci, pred vama se nalazi decembarsko izdanje Školskog lista „Mostovi“ ovaj put samo u elektronskoj formi. Nadamo se da ćete uživati čitajući naše zapise iz školske 2021/2022. godine. Protekle dvije školske godine, po svemu specifične, duge će nam svima ostati u sjećanju. Nastava se realizovala u vrijeme svjetske pandemije – COVID-19 koja još traje. Učili smo i radili online, kombinovano, uživo i na mnogobrojne druge načine koristeći sve raspoložive elektronske i web alate, a sve s ciljem da naši učenici ne budu oštećeni u procesu učenja i da znanja predviđena za određeni razred usvoje na što lakši način.

U ovom broju možete pročitati izvještaj o realizaciji projekta „Zajednički naponi za 5% manje otpada-5% MANGA“, nastavku saradnje sa bratskom školom Hayriye Kayrakli iz Istanbula, o učesću učenika naše škole na takmičenju iz robotike i programiranja, XI Državnog takmičenja iz programa „Svjesnost o postojanju mina“, možete se informisati o načinu obilježavanja Mjeseca knjige i Dana državnosti Bosne i Hercegovine, te pročitati nagrađene radove učenika naše škole. Također, u rubrici „Iz učeničkog pera“ možete pročitati neke od najljepših literarnih ostvarenja i pogledati likovne radove naših malih umjetnika.

S poštovanjem,

Redakcija Literarno-novinarske sekcije

Javna ustanova Osnovna škola „Suljo Čilić“ Jablanica

Ulica Komune Vejle br.28

88 420 Jablanica

www.suljocilic.com.ba

mail:os.cilic@bih.net.ba

tel/fax: 036 752-801

SADRŽAJ:

<i>-Uvod</i>	<i>2</i>
<i>-Sadržaj</i>	<i>3</i>
<i>-Obilježili smo...</i>	<i>4</i>
<i>-Mjesec knjige</i>	<i>5</i>
<i>-5.oktobar – Dan učitelja</i>	<i>6</i>
<i>-25. Novembar- „Dan državnosti BiH“</i>	<i>8</i>
<i>- Projekti: „Zajednički naponi za 5% manje otpada- 5%MANJE“</i>	<i>10</i>
<i>-Takmičenja:</i>	
<i>-Takmičenje iz robotike i programiranja</i>	<i>11</i>
<i>-Državno takmičenje iz programa ”Svjesnost o postojanju mina”</i>	<i>12</i>
<i>-Posjete...</i>	<i>13</i>
<i>-Obilježavanja...</i>	<i>14</i>
<i>- Mi smo stigli</i>	<i>15</i>
<i>-Iz učeničkog pera</i>	<i>17</i>
<i>-Likovni radovi naših malih umjetnika</i>	<i>18</i>
<i>-Preporuka za čitanje</i>	<i>19</i>
<i>-Zabavni kutak</i>	<i>20</i>
<i>-Redakcija</i>	<i>21</i>

Obilježili smo ...

MJESEC KNJIGE

Mjesec oktobar se obilježava kao mjesec knjige u cilju popularizacije književnosti i čitalaštva. U ovom mjesecu česti su sajmovi na kojima se okupljaju izdavači, veliki pisci i dugogodišnji zaljubljenici u pisanu riječ. Navedene grupe ljudi su oni koji knjigama posvećuju dostojnu pažnju, ističući njihovu važnost u obrazovanju i izgradnji ličnosti svakog pojedinca. Tim povodom u našoj školi provedene su brojne aktivnosti obilježavanja mjeseca knjige, a posebno izdvajamo javni poziv za sve učenike od VI do IX razreda i provođenje takmičenja u pisanju literarnih radova na temu: „Knjiga je da se čita.“ sa sljedećim rezultatima: 1. mjesto – Lejla Seferović VIII₂ ; 2. mjesto- Elena Davidovski VII₄ i 3. mjesto- Nera Kevrić VI₂. Članovi likovne sekcije su svoj doprinos dali kroz pano koji opisuje detalje iz poznatih bajki koje su sastavni dio odrastanja svakog djeteta.



Prvonagrađeni rad:

KNJIGA JE DA SE ČITA

Školska biblioteka, savršen mir i toplina ispunjavaju prostor. Na velikim policama uredno složene knjige koje izazivaju čudan osjećaj, pomalo zastrašujući. Na prednjim policama su školske lektire sa velikim i privlačnim ilustracijama. U drugom dijelu biblioteke osjeća se miris starog papira. Mnoštvo knjiga me navodi na razmišljanje o knjigama: Čemu knjige služe? Koliko ljudi je pročitale ove knjige? Zašto ljudi čitaju?

Posmatrajući naslove na knjigama shvatam koliko je truda uloženo u svaku od njih kako bi te iste knjige prenijele čitaocu znanje i iskustva autora.

Savršeno složene na policama knjige izgledaju tihe i nijeme, ali za čitaoca imaju suprotno značenje. U svakoj knjizi čitalac pronalazi zabavu, znanje, razonodu, sa knjigom postajemo bolji ljudi. Svaka riječ u knjizi je stepenica kojom se penjemo, uzdižemo svoje znanje o svijetu. Svaka pročitana knjiga oplemenjuje nas, daje nove ideje, otvara nove vidike i shvatanja svijeta oko nas. Knjige nam daju znanje, kad smo tužni pružaju utjehu, kad smo usamljeni prave društvo... Knjigu možemo ponijeti sa sobom na izlet, putovanje, na plažu.


Knjiga zaboravljena na polici ne predstavlja ništa osim nekoliko stranica papira koje vremenom požute i skupe mnoštvo prašine. Svoju vrijednost knjiga pokazuje samo ako se čita. Što više ljudi pročita knjigu, knjiga je vrijednija i dragocjenija. Svaka knjiga ima važnu poruku koju ćemo razumjeti čitajući. Knjiga je da se čita

U tako tihom i mirnom prostoru skupljeno je mnoštvo znanja o ljudima, prirodi, historiji, svijetu u kojem živimo, o životu. Sve mudrosti i znanja može vidjeti samo čitalac.

„Knjige su kao brodovi koji prolaze kroz ogromno more vremena.“

– Francis Bacon –

Lejla Seferović VIII₂



5. oktobar - DAN UČITELJA

Svjetski dan učitelja obilježava se svake godine 5. oktobra. Taj dan je prilika da se pokaže da je rad učitelja i nastavnika prepoznat kao jedan od najvažnijih za ukupan razvoj društva te da se kao takav i cijeni.



Šta kažu mala raja?



“Moja učiteljica je lijepa i zabavna. Volim svoju učiteljicu, jer nas uči zanimljivim stvarima.” Vedad Kevrić, V razred, PO Ravna



“Ja volim svoju učiteljicu, jer nam priča zanimljive priče.”

Amar Delić, IV razred, PO Glogošnica

“Moja učiteljica je fina, zato što mi daje tačnice. Ja je puno volim.”

Dženan Letuka, III razred, PO Ravna

“Moja učiteljica je jako brižna i draga. Svaki dan nas uči nešto novo. Puno je volim, jer nas je naučila čitati i pisati. Hvala puno učiteljice.”

Adrijan Perković, V razred, PO Slatina

“Moja učiteljica je zabavna i lijepa. Moja učiteljica je smiješna i voli se šaliti. Naša učiteljica nas uči kako da se lijepo ponašamo. Volim je zato što je naša učiteljica..”

Lamija Jamaković, IV razred, PO Ravna

„Moja učiteljica je zabavna. Ja je volim, jer je zanimljiva, jer me uči zanimljivim stvarima. Ja puno volim svoju učiteljicu.”


Sajra Kevrić, III razred, PO Ravna

“Moja učiteljica je lijepa i vesela, zabavna i smiješna. Volim svoju učiteljicu zbog toga što nas je naučila svašta, što nam čita priče...”


Džana Jamaković, V razred, PO Ravna

“Moja učiteljica je zabavna. Puno je volim.”


Amna Čilić, II razred, PO Ravna



Ilhan Čilić, IV razred, PO Slatina



Lejla Hindić, IV razred, PO Glogošnica



Dženan Potur,
V razred, PO Ravna



“Moje učiteljice”

Belma Jamaković, III razred, PO Ravna




Najla Keskin , IV razred, PO Glogošnica



Amna Čilić. II razred,
PO Ravna



'Moja učiteljica'
Čilić Dalila, II razred,
PO Glogošnica



Petra Perković,
V razred, PO Slatina

25.novembar – DAN DRŽAVNOSTI BOSNE I HERCEGOVINE



Prvo zasjedanje Zemaljskog antifašističkog vijeća narodnog oslobođenja Bosne i Hercegovine (ZAVNOBiH) održano je 25. novembra 1943. godine u Mrkonjić Gradu. Na tom zasjedanju Bosna i Hercegovina je definisana kao jedinstvena i nedjeljiva država u kojoj će svi narodi imati ista prava, i živjeti u slobodi i jednakosti.



Tim povodom **25. novembra 2021. godine** Svečanom akademijom Općinskog vijeća Jablanica obilježen je **25. novembar – Dan državnosti BiH**. Općinski načelnik Damir Šabanović je na osnovu rezultata nagradnog konkursa literarnih radova za učenike naše škole novčano nagradio učenike: prvonagrađena Alma Ćemić VII₂ razred, drugoplasirani Danijal Ivković IX₁ razred i trećeplasirani Tarik Idrizović VIII₁ razred. Tema nagradnog konkursa je bila: „Zemlja od kamena“

ZEMLJA OD KAMENA

1.mjesto

Da te volim duša zna, draga moja BiH,...Kako lijepe riječi, pune emocija. Kada ih izgovaram, zatremtim. Jer te riječi su tako čiste i dolaze iz najvećih dubina moje duše, iz srca, u kome svako od nas ima veliko mjesto za našu domovinu. Ona zauzima posebno mjesto u našim srcima, koje niko i ništa ne može zamijeniti. S godinama, to mjesto u srcima postaje sve veće i veće. Šta je zapravo domovina? Koliko znači ta riječ od osam slova? Tako jednostavna riječ, a tako veliko značenje.



Domovina je nešto, neka ljubav koja se ne može riječima iskazati. Ljubav, koja je u nama, u našim srcima, od rođenja pa do smrti, ljubav koja je u nama čitavog života i ne gasi se, nego postaje sve jača i jača. Domovina je, kao naša druga majka, koja nas prima pod svoje okrilje i nudi nam sva svoja bogatstva i ljubav.

Domovina je mjesto gdje smo rođeni, odakle potičemo, gdje smo rasli, proveli svoje djetinjstvo, smijali se i plakali.

Zapitajmo se, šta je čovjek bez domovine, ... i bez jezika svoje domovine?

Kažu da je najteže objasniti ljubav, jer ljubav se ne objašnjava, ljubav se živi. Bosna je mala, ali bogata zemlja. Zemlja, koju su mnogi željeli osvojiti, pokoriti, unišiti. Zemlja, kojoj su željeli oduzeti njene ljepote i bogatstva, o kojima su oni mogli samo sanjati. Zemlja, u kojoj je proliveno mnogo krvi i suza. Zemlja, koja je uvijek bila na meti stranih osvajača. Zemlja, koja je vidjela više majki kako prolijevaju more suza, nego majki koje se smiju i vesele zajedno sa svojom djecom. Zemlja, koja je proživjela mnoge ratove, ali ipak, ostala slobodna. Zemlja, koja je svoju slobodu plaćala krvlju. Zemlja, koja je sigurno, ponosna na svoje kćeri i sinove koji su dali život za njenu slobodu. Zemlja od kamena!

Bosna, srcolika država u srcu Balkana, uvijek je važila za mjesto na kojem se Istok i Zapad sudaraju. Da li zbog svoje ljepote ili različitosti koje samo ona ima, svi su je željeli osvojiti. Vladari su se smjenjivali, od Rimljana do Austrougara, a Bosna kao kraljica uvijek je uspravno stajala i svaki put se odupirala najezi neprijatelja koji su željeli nju pokoriti, a njen narod pretvoriti u robove.

U ovoj zemlji ima i tuge i bola, ali ima i mnogo toga lijepoga, mnogo toga što od nas čini stablo koje je pustilo korijenje u hladnim bosanskim rijekama, u nepreglednim šumama Zelengore i Perućice, divljini Bjelašnice ili u mirisu kahve u sevdahom raspjevanim bosanskim čaršijama. Bosno moja, divna, mila..., sretna sam, jer si opstala i ostala prkosna i ponosna, zemlja od kamena.

Volim te, moja jedina, najdraža, najljepša domovino, Bosno i Hercegovino!

Alma Čemić VII₂

Projekat „Zajednički napori za 5% manje otpada- 5%MANJE“

Projekat „Zajednički napori za 5% manje otpada- 5%MANJE“ je projekat teritorijalne saradnje između Bosne i Hercegovine i Crne Gore koji implementira IPA II CBC BiH – Crna Gora 2014-2020. Projektom se nastoji poboljšati integrirani i ekološki prihvatljiv sistem upravljanja otpadom na području šest općina (Jablanica, Konjic, Prozor, Šavnik, Žabljak, Pljevlja) programskog područja BiH-CG te povećati količina recikliranog otpada za 5%. Ukupna vrijednost projekta je 493.019,00 EUR. U projekat je uključena naša škola, a aktivnosti vezane za projekat vodi nastavnik Čemić Adis.

Nakon niza aktivnosti koje su realizovane prethodne godine, u trening centru održan je sastanak sa predstavnicima LiNK iz Mostara na kojem je prezentovana brošura za Eko sekcije pod nazivom „ Put do ekološki osvještenog društva“.



Osim prezentacije brošure napravljen je i prezentovan Godišnji operativni plan rada eko sekcije po mjesecima za tekuću školsku godinu.

Cilj projekta je unaprijediti integrirani i ekološki prihvatljiv sistem upravljanja otpadom na području šest općina programskog područja BiH – CG (Jablanica, Konjic, Prozor - Rama, Šavnik, Žabljak i Pljevlja).



U sklopu projekta donirana su početna sredstva za izgradnju ekološke učionice na dijelu školskog dvorišta, te su 9.9.2021. godine započeti radovi na izgradnji iste. Također, dogovorena je saradnja na zajedničkim projektima u narednom periodu. Sastanku su prisustvovali direktorica LiNK Mostar gđa Alisa Gekić sa saradnicima i direktor škole sa uposlenicima.

Udruženje LiNK Mostar, **8.decembra 2021.godine** je u sklopu projekta ” 5% manje otpada ” doniralo 30 komada novih sadnica ruža, jedno dekorativno stablo i alat za rad u vrtu. Isti dan je EKO „Neretva“ našoj školi doniralo pet komada sadnica dekorativnog drveća te je sadnja istih izvršena isti dan u dvorištu škole. Svoj doprinos u sadnji i uređenju dvorišta dali su učenici naše škole.



Takmičenje iz robotike i programiranja

Na ovogodišnjem 32. Internacionalnom sajmu knjige, koji je održan **u periodu od 6. do 11. oktobra**, svoje učešće uzela je kompanija IMTEC kroz organizaciju takmičenja iz poznavanja robotike i programiranja.

Tema takmičenja bila je programiranje m:bot Makeblock robotića po zadatku, a pravo učešća su imali učenici osnovnih škola, nevladinih organizacija ili udruženja građana. Učesnici su bili okupljeni u tim do tri osobe i takmičenju su pristupili putem platforme Teams, uz mogućnost prisustva mentora.

Ovo takmičenje je predstavljeno kao odlična prilika da se učenici isprobaju u svijetu programiranja i upravljanja robotima, te da kroz zabavu steknu nova znanja i iskustva.

Prva polufinalna grupa u čijem sastavu je i naša škola imala je takmičenje 6.10. 2021. Grupu su činile sljedeće škole: OŠ ”Meša Selimović” Zenica, OŠ ”Miroslav Krleža” Zenica, OŠ ”Suljo Čilić” Jablanica i NET akademija Zenica.



Učenici naše škole Ema Begović, Benjamin Idrizović i Danijal Ivković, osvojili su prvo mjesto i tako se kvalifikovali u finale koje je održano u nedjelju 10.10.2021.g. na kojem je ekipa naše škole bila ponovo najuspješnija sa osvojenim prvim mjestom.

Takmičenje je organizovano tako da su organizatori bili prisutni u predviđenom prostoru na Sajmu knjige u Skenderiji, a takmičari su prisustvovali online putem platforme Teams. Takmičarske ekipe su na raspolaganju imale desktop računar ili laptop, te web kameru.



Tema takmičenja je programiranje M:bot robota po zadatku. A konkretan zadatak je bio da se programira robot koji će na kvadratnom metru prostora svojim kretanjem napraviti osmicu.

Programiranje robota se vršilo u M:blocku, a demonstraciju je organizator vršio na M:botu u predviđenom prostoru na Sajmu. Takmičarima je bilo dozvoljeno da prilikom kodiranja testiraju kod na M:bot robotu u svom prostoru.

XI Državno takmičenje iz programa “Svjesnost o postojanju mina”

XI Državno takmičenje učenika osnovnih škola iz programa „Upozoravanje na opasnost od mina“ u organizaciji Crvenog križa Federacije Bosne i Hercegovine održano je 3. i 4. decembra 2021.godine. Realizacija ovog takmičenja je bila planirana za mjesec april 2020.godine, te je isto pomjereno zbog pojave pandemije izazvane koronavirusom. Nakon završenog Federalnog takmičenja koje je održano u decembru 2019.godine na kojem je ekipa naše škole u sastavu Đana Šehić, Amina Bilić i Lejla Pilav, osvojila prvo mjesto, ekipa se direktno plasirala na državno takmičenje. Na takmičenju su učestvovalе tri ekipe iz Federacije Bosne i Hercegovine i tri ekipe iz Republike Srpske, a održano je u Bijeljini u Etno selu „Stanišići“ u kojem je pored takmičarskog dijela održan i revijalni dio programa sa dodjelom nagrada i diploma. Ekipa naše škole nije uspjela ostvariti rezultat na ovom takmičenju.



Posjete ...

Saradnja sa bratskom školom Hayriye Kayrakli iz Istanbula

Pojavom pandemije izazvane koronavirusom obustavljena je posjeta učenika i nastavnika naše škole Republici Turskoj, što je unazad nekoliko godina bila praksa.



Međutim, saradnja je nastavljena pozivom od bratske škole iz općine Badžilar u Turskoj, koja je realizovana u periodu od **12. do 16. oktobra 2021. godine.**

Tročlana ekipa naše škole u sastavu direktora Idrizović Edina, nastavnika Ćemić Adisa i Muminhodžić Muhameda, u tom periodu je boravila u Turskoj.



Cilj posjete je nastavak dosadašnje saradnje i potpisivanje novog sporazuma o saradnji na četiri godine. Isti je potpisan pod pokroviteljstvom Ministarstva obrazovanja Republike Turske, Instituta Yunus Emre i Ministarstva obrazovanja Općine Badžilar.

Općina Badžilar donirat će 100 tableta za učenike koji izučavaju turski jezik kao drugi strani jezik, a i za opremanje naših informatičkih kabineta (realizacija u toku).



Učenici i nastavnici iz škole Hayriye Kayrakli posjetili su našu školu u novembru ove godine, a uzvratna posjeta učenika i nastavnika naše škole dogovorena je za mart 2022. godine, tokom proljetnog raspusta učenika

Nakon potpisivanja novog Protokola o bratimljenju naše škole sa bratskom školom iz Badžilara Hayriye Kayrakli, u periodu od **15. do 19. novembra 2021.godine** u našoj školi boravila je ekipa u sastavu direktora, nastavnika i učenika iz pomenute škole. Gosti su stigli u ponedjeljak u poslijepodnevним satima, a sastanak sa predstavnicima naše škole održan je u utorak u trening centru. Riječima dobrodošlice i zahvale direktor škole Edin Idrizović je zaželio ugodan boravak u našem gradu, a odmah nakon toga održan je sastanak na kojem je dogovorena daljnja saradnja, rad na projektima odgojno-obrazovne djelatnosti i uzvratna posjeta naših učenika koja je planirana za mart naredne godine. Ovom posjetom gosti su imali priliku upoznati se sa kulturno-historijskim znamenitostima, kulturom i tradicijom našeg grada, Hercegovine i naše države. Učenici su bili smješteni kod porodica učenika- domaćina.

OBILJEŽAVANJA ...

U povodu obilježavanja 12.decembra - Dana nauke koji se ujedno slavi povodom dodjele Nobelove nagrade velikom istraživaču i naučniku Vladimiru Prelogu, Muzej ”Bitka za ranjenike na Neretvi” u saradnji sa JU Srednja škola Jablanica organizovali su zajednički program pod nazivom „Dan otvorenih vrata“. Tim povodom, učenici Srednje škole i voditelji sekcije prirodnih nauka su u sklopu ovog programa demonstrirali zanimljive naučne eksperimente, a u cilju popularizacije nauke i podizanja svijesti mladih kako bi se kod njih pobudila želja za bavljenjem naučnim radom i istraživanjima. Učenici IX₁ i IX₂ razreda u pratnji nastavnika Palić Samira, Begović Ilhane i pomoćnice direktora Budim Lejle prisustvovali su datom programu.





Mi smo stigli..

Najuzbudljiviji dani
Djeca i roditelji.
Početak septembra
Vrijeme je da svi uče.

Škola otvara vrata
Svi su pozvani da uče.
Želimo vam radost u tome!

U fiskulturnoj sali naše škole, **2.septembra 2021.** godine upriličen je prijem za đake prvake. Učenici su sa svojim roditeljima u školu na prijem dolazili u dva različita termina, poštujući sve propisane epidemiološke mjere.



Učenicima i njihovim roditeljima riječima dobrodošlice su se obratili načelnik općine Damir Šabanović, predsjedavajući općinskog vijeća Emir Muratović, direktor škole Edin Idrizović, pedagogica Samira Gorančić i učiteljice I₁ Mirna Zahirović, I₂ Aida Čilić.

Budžetom Općine Jablanica obezbijedena su sredstva za nabavku udžbenika za sve učenike, te su tokom prijema našim prvačićima uručeni udžbenici.

Iz učeničkog pera...



KNJIGA JE DA SE ČITA

Da se mene пита
Knjiga je da se čita
Rado ću vam reći
Pročitajte svaku
Znanje ćete steći.

Nisu knjige namijenjene
Da se s njih prašina briše
Knjige su da se čitaju
U njima mnogo toga piše.

Neke su zanimljive, lijepe
Neke čak dosadne i teške
Al' vam kažem da je knjiga
Prijatelj bez greške.

Knjiga obasjava dušu
Kao sunce dom
Zato uvijek čitajte
I ostajte pri tom.

Emir Ivković VIII₂

ZEMLJA OD KAMENA

Kad pogledam preko ramena
Vidim svoju zemlju od kamena
Čvrsticu, Prenj i Plasu
Dok govorim o njima
Imam posebnu toplinu u glasu.

I o Neretvi modroj što teče
Ka jugu, sa osmijehom
Pričam svom dalekom drugu.

Hercegovinu volim sa mnogo žara
Ne bih je napustio, nema tih para.
Lijepo je biti mostarski gost
i posjetiti taj „Stari most”.

Divno li je vrelo Bune,
A lijepi su naši i slapovi Une
Bobovac i Bašćaršiju
Katedralu i džamiju
Od kraljeva i sultana
Pa sve da današnjeg dana

Bosna naša sve to ima
Dobre ljude rado prima.

Ljudi su ovdje srdačni i mili
Bosanci i Hercegovci su
Odvajkada to i bili.

Dođi i u našoj zemlji budi gost,
pružamo ruke
i gradimo prijateljstva most.


Emir Ivković VIII₂




★ LIKOVNI RADOVI NAŠIH MALIH UMJETNIKA ★



Dalila Hodžić VII₂



Lamija Vučić VII₄




Stefan Ivanišević VIII₄




Nejra Islamović VII₄



LIKOVNI RADOVI NAŠIH MALIH UMJETNIKA




Elena Davidovski VII₄



Adna Džino VII₂




Fatima Šehić IX₁



Lejla Begović VII₁

Preporuka za čitanje...



Vlak u snijegu poznato je djelo književnika Mate Lovraka. Od samog početka ova krasna priča daje naznake zanimljivog štiva koje će svaki čitalac pročitati s oduševljenjem čak i ako je upoznat s radnjom djela prije čitanja.

Upoznavanje ove prekrasne družine i okoline u kojoj provode najviše vremena ukazuje na njihove karakterne raznolikosti. Neki od njih su radišni i marljivi, a neki su spori ili lijeni, ali svi čine jednu cjelinu koja je savršeno funkcioniše. Želja za vlašću i mogućnostima koje ona pruža prožeta je dozom zavisti tako da neki od likova ne prezaju ni pred podmićivanjem kako bi li se domogli prestižne pozicije.

Već u ranoj dobi na vidjelo izlaze negativne karakterne osobne nekih likova, samo što se te negativnosti u dječjem svijetu ispravljaju bezbolnije i pravednije nego u realnosti. Djeca su iskrena i u toj iskrenosti znaju nanositi bol jedni drugima, ali sve to služi tome da se kasnije istakne pozitivni završetak.

Priča ovog romana ispričana je u nekoliko tematskih dijelova. U prvom djelu govori se o glavnim likovima družine i njihovim problemima, upoznajemo se sa školom i razredom, te osnivanjem zadruge kojoj djeca posvećuju nevjerovatnu ozbiljnost kakve nema kod odraslih. Oni ulažu nevjerovatan trud da dokažu svoju zrelost i pokažu da su dorasli svakom problemu.

Drugi dio romana vodi nas na put u veliki grad. Djeca uživaju na putu, ali problemi nastaju na povratku jer tek tada moraju dokazati svoju slogu i zajedništvo. Dokazuju da su dorasli poštovanju odraslih, što zbog brige o bolesnima, zauzeća za druge osobe, uspostavljanju reda u kriznim situacijama i marljivom radu.

Mate Lovrak je rođen 8. marta 1899. g. u Velikom Grđevcu kod Bjelovara. Pohađao je gimnaziju u Bjelovaru gdje je jednu godinu morao ponavljati budući da je imao nedovoljan iz hrvatskog jezika. Književnošću se bavio 50 godina, a početak velikog razdoblja kada su uslijedila jedna od njegovih najpoznatijih djela bio je između ratova kada su u hrvatskoj književnosti prevladavale najviše novele za starije.

Djela su mu prevedena na mnoge jezike, a pisao je i stručne članke u pedagoškim časopisima. Po romanima *Vlak u snijegu* i *Družba Pere Kvržice* snimljeni su uspješni filmovi. Ostala Lovrakova najpoznatija djela su: *Divlji dječak*, *Neprijatelj broj 1*, *Doka Bedaković ili sto tisuća na cesti*, *Anka Brazilijanka*, *Zeleni otok*

Zabavni kutak ...

Malci genijalci




ZA LJUBITELJE MATEMATIKE

ŠTA STOJI NA MJESTU UPITNIKA?

$$\begin{array}{l} \text{cupcake} + \text{cupcake} = 18 \\ \text{lollipop} + \text{lollipop} = 23 \\ \text{cupcake} + \text{lollipop} = 16 \\ \text{lollipop} - \text{cupcake} \times \text{lollipop} \div 2 = ? \end{array}$$

KOJI BROJ STOJI NA MJESTU UPITNIKA?



Novogodišnja čestitka

**U NOVOJ 2022. BUDITE ZDRAVI,
SRETNI I UVIJEK LIJEPO RASPOLOŽENI.
ŽELIMO VAM PUNO SREĆE I USPJEHA.**

SRETNNA NOVA 2022. GODINA!



OSNOVNA ŠKOLA „SULJO ČILIĆ“ JABLANICA

Rukovodstvo i članovi Literarno-novinarske sekcije školske 2021/2022. godine.